

# «Mai crudar pli profund ch'en ils mauns da Dieu»

La vita dad Andreas Luzi Cabalzar tuna sco in roman spannegiont

DA CLAUDIA CADRUVI / ANR

■ Referir avant banchiers u far predi en baselgia. Per Andreas Cabalzar èsi il medem. Ina visita tar il plevon dad Erlenbach. La chasa-pravenda è tranter la via principala ed il Lai da Turitg. En curtin hai ina clasira cun lieurs. Insatgi ha chapì da construir la clasira uschia che las lieurs na pon betg chavar in vau sut la saiv ora e ch'ellas han tuttina avunda spazi. A la porta da la chasa-pravenda fa il chaun bainvegni. En chasa giaschan utensils d'uffants tranter sculpturas d'art. Il chaun sa metta ruassaivalamain sin sia cozza e na fa betg huz. El è para disà cun visitas.

## La Quotidiana sin il pult

Il biro dal plevon è stacanà cun cudeschs. I ha massa pitschnas sculpturas u souvenirs sin las curunas. Avant la finestra s'extenda il lai. Sin il pult l'ediziun da La Quotidiana.

Il plevon vegn e cumenza a raquintar.

«En famiglia dian tuts Deia a mi. Jau sun stà in uschenumnà 'Nachzügler'. Jau sun naschì a Tavau. Mes bab era plevon là. Pli tard è el vegnì clamà a Turitg en la Predigerkirche en il Niederdorf.

En il Niederdorf sun jau i a scola cun uffants da mastergnants, uffants d'artists ed uffants or dal milieu. Mes geniturs han gi' ina chasa averta. Nus avevan adina students grischuns tar nus. Mes bab era da l'opiniun che nus stuain parter cun auters ils privilegis che nus avain tras la baselgia. I n'ha mai dà ina tschavera che nus fissan stads be la famiglia en davos maisa. Nus avain adina dastgà prender noss amis a chasa. Quai è stà pussaivel grazia a nossa mamma. Ils clochards dumandavan era adina suenter la 'Frau Pfarrer', sch'els spluntavan a nossa porta.

Nus discurrevan rumantsch a chasa. Sch'jau dev ina resposta tudestga, scheva mes bab: 'Tschantscha endretg!'

## Fatg enconuschientscha cun la Rote Zora

Il Niederdorf n'è betg mo in quartier da divertiment. Igl è in vitg. Sch'ins va giadora la damaun, salida la gliued dretg e sanester. Ad in uffant na po en sazez capitar nagut.

La saira èsi auter. Lura vegn la gliued dad ordvart ed intgins sa deportan sco pors. I deva dentant adina il



Andreas Cabalzar discorra fitg avert e direct da sia vita.

FOTOS C. CADRUVI

'Egga'. Quai era la stiva dal «Niederdorf». La gliued dal Dörfli s'entupava là cun musichers, acturs u alcoholichers. Ins gidava in l'auter.

Il Niederdorf è stà ina buna scola. Jau mav p. ex. a scoletta cun la figlia da la Rote Zora. Quai era la pli renomada prostituada da Turitg. Jau ed in ami tentavan la mattatscha. In di è la Rote Zora cumparida sin il plaz pausa. Ella ha fatg tut agrad giu cun mai. Jau n'hai mai pli mulestà la pitschna.

## Il temp da la 'Bewegung'

Suenter scola hai jau fatg il mercantil sin banca. Jau spetgav bler dal mund da lavur. Jau m'imaginav da gudagnar ina massa raps e da pudair viagiar. Ma quest mund n'era per part betg bler auter che la scola. Tuttina hai jau mors atras l'emprendissadi en la banca. Il davos hai jau era lavorà a la bursa.

Jau hai giugà en la liga naziunala B da ballamaun. Igl era il temp dal moviment da giuventetgna tranter il 1980 ed 82. L'emprim ma parivan las pretensiuns da la 'Bewegung' memia extremas. Ina saira suenter il trena-

ment sun jau casualmain grategià tranter las frontas. Jau hai era vesì policists che han patangà ensemen in enconuschent da mai. Davent da quel mument sun jau era stà da la partida. Igl era in resvegli cunter las autoritads, ma era cunter mes bab.

## Dispitas

Cun mes bab hai jau gi' bleras dispitas da quel temp. Nus n'eran betg da la medema opiniun pertutgant il moviment. Tuttina ha el avert quatter giadas sia baselgia per dar albiert a la gliued dal moviment.

Jau ma ragord bain da la davosa giada ch'i ha dà ina radunanza plenara en baselgia: Jau e mes bab avevan gi' rabanschas l'entir suentermezdi. Ma la saira, cura che la gliued da la «Bewegung» è sa radunada en baselgia, ha mes bab impedi che la polizia ha rumi la baselgia. Avant il potal è el sa mess cunter il cumandant da la polizia. El ha ditg che la polizia na haja nagin dretg d'entrar. La baselgia duai esser in lieu avert e protegì. La teologia liberala da mes bab e sia vita autentica han laschè profunds fastizs en mia existen-

za. Jau sun engraziaivel per las dispitas ch'jau hai gi' cun mes bab e per la proenziun ch'jau hai survegni dad el.

Pli tard cura ch'jau hai cumenzà a studegiar, hai jau realisà quantas pussaivladads ch'in plevon ha. Durant il studi ha l'etica fascinà mai. En quel rom hai jau emprendì dad analisar e dad argumentar en in conflict. L'etica na di betg simplamain tge ch'ins sto far per esser in bun carstgaun. En l'etica avain nus emprendì, co ch'ins va

enturn cun in'opiniun che n'è betg l'atgna opiniun.

## Salas plainas

Oz tegn jau referats davart etica. Jau vegn envidà, p. ex. da l'UBS, a seminaris d'etica economica. En sazez fatsch jau là betg bler auter ch'en baselgia. La gliued da l'economia na vulentant betg vegnir missiunada. Ma entras quai che la banca envida in plevon, sun jau ina attracziun. E las salas èn plainas.

Quai è fitg impurtant. Jau fatsch mia lavur en baselgia. Ma jau mon era tar la gliued – là nua ch'ella viva e lavura. Tar diversas firmas vegn jau envidà da far meditaziuns da mezdi. Jau discuro da depressiuns, dal burn-out-sindrom, da la balantscha tranter vita privata e professiun. Uschia emprenda la gliued d'enconuscher mai. Ed uschia vegn inqualin cun in problem tar mai, che fiss uschiglio betg i tar in plevon.

Per pudair far talas chaussas ston ins dentant avair las cumpetenzas. Igl è bun, sch'ins enconuscha il mund e la lingua da l'economia.

## Adina crudar en ils mauns da Dieu

Il cussegl da la pravenda dad Erlenbach stat davos mai. Jau hai grondas libertads. Cura ch'jau hai realisà cun mia dunna en la chasa Weidenhof in albiert per giuvenils en crisa, hai jau gi' sustegn cumplain.

Cura ch'jau hai cumenzà a studegiar teologia, er'jau anc in ateist.

Anc oz datti muments ch'jau dubitesch. Dubis tutgan tar mai. Els sviluppeschan mia cretta. En mes dubis chatt jau mias respostas. Jau sai dentant ch'jau na pos mai crudar pli profund ch'en ils mauns da Dieu. Quai dat a mi gronda forza.»

## Curt e bun

*Num:* Andreas Luzi Cabalzar  
*Naschì:* ils 22 da matg 1962  
*Domicil:* Erlenbach ZH  
*Burgais:* Da Duvin  
*Stadi civil:* Maridà, bab da trais figlias  
*Lieu da vacanzas:* Sagogn  
*Tratga preferida:* Bizochels e buglia da maila  
*Bavronda preferida:* Vin dal Piemont  
*Musica:* Living Colours, Miles Davids  
*Litteratura:* Bibla, Rilke, Dürrenmatt

